



Број/Број:03/1-50-1-7-40 -3с/09
Сарајево/Sarajevo: 8.6.2009.godine

Članovima Zajedničke komisije za odbranu i sigurnost BiH:

Šefiku Džaferoviću, Vinku Zoriću, Dragi Kalabiću, Mirku Okoliću, Jozi Križanoviću, Sulejmanu Tihću, Hazimu Rančiću, Branku Zrni, Ivi Miri Joviću, Dušanki Majkić, Slobodanu Šarabi i Ademu Huskiću

PREDMET: Informacija o održanom sastanku predstavnika Zajedničke komisije za odbranu i sigurnost BiH s predstavnicima Odbora za bezbjednost Narodne skupštine Republike Srpske, Banja Luka, 3.6.2009.
Veza, akt broj: 03/1-50-3-614/09

Članove Zajedničke komisije za odbranu i sigurnost BiH, 3.juna 2009., u zgradi NSRS-a u Banjoj Luci, primili su: Petar Đokić, predsjednik, Zoran Đerić, Mira Popović, Ilija Vujičić i Miroslav Kraljević, članovi Odbora za sigurnost Narodne skupštine RS-a (NSRS).

U ime Zajedničke komisije za odbranu i sigurnost BiH (ZK), sastanku su prisustvovali: Branko Zrno, predsjedavajući, Slobodan Šaraba, zamjenik predsjedavajućeg, Mirko Okolić, član ZK, Dragica Hinić, sekretar, Željko Grubešić, stručni savjetnik, i Jovica Katić, stručni saradnik.

Petar Đokić je, u uvodnom dijelu, pozdravio članove ZK i izrazio posebno zadovoljstvo posjetom. Potom je upoznao članove ZK sa:

- aktivnostima Odbora za sigurnost NSRS-a,
- Zakonom o parlamentarnom nadzoru RS-a koji je usvojen 2005. godine, a nakon prestanka rada Komisije za reformu odbrane izmijenjen tokom 2007. godine,
- interesom članova Odbora za sigurnost NSRS-a za saradnju sa ZK, pri čemu posebno značajnim smatra potrebu međusobnog informiranja o pitanjima iz sektora odbrane i sigurnosti,
- značajem održavanja konferencije o aktuelnom stanju sigurnosti, pri čemu je Odbor za sigurnost NSRS-a izrazio spremnost da podrži održavanje naredne konferencije u Banjoj Luci. Razloge za održavanje konferencije vidi u postojanju brojnih problema koje treba aktuelizirati i definirati, kao što je Strategija za borbu protiv kriminala, korupcije, te niz drugih pitanja iz oblasti sigurnosti.
- spremnošću članova Odbora za sigurnost NSRS-a za raspravu o prijedlozima zakona koji vode BiH ka EU, posebno onih zakona koji će riješiti pitanja libelarizacije viznog režima.

Zoran Đerić je također izrazio zadovoljstvo susretom članova ova dva parlamentarna radna tijela. Predložio je da se održi sastanak svih parlamentarnih odbora i komisija u BiH o tematici koja tretira neovlašteno presretanje telekomunikacija, gdje je potrebno puno više edukacije za članove komisija kao i transparentnosti u informiranju javnosti.

Inicirao je i razgovore o formiranju građanskog vijeća u kojeme bi bili stručnjaci iz različitih oblasti, a imali bi uticaj na neke procese u kojima je potrebno čuti predstavnike akademske zajednice i stručnjaka, misleći na slično vijeće koje je formirano u Hrvatskom saboru.

Branko Zrno je u uvodnom izlaganju predstavio rad ZK u proteklom periodu i izrazio zadovoljstvo susretom s članovima Odbora za sigurnost NSRS-a.

Posebno se osvrnuo na rezultate Prve konferencije o aktuelnom stanju sigurnosti u BiH koja je održana u decembru 2008. godine u Sarajevu. Naglasio je potrebu međusobnog informiranja i predložio da ZK, u saradnji s Odborom za sigurnost NSRS-a, održe Drugu konferenciju o aktuelnom stanju sigurnosti u Banjoj Luci.

Slobodan Šaraba pozvao je članove Odbora za sigurnost NSRS-a i ZK na saradnju, na razgovor o prijedlozima zakona koji su od općeg interesa, na međusobno informiranje i održavanje susreta koji će doprinjeti boljem razumijevanju i time isključiti bespotrebne polemike o pitanjima koja čine život jednostavnijim. Pozvao je učesnike sastanka da se okrenu suštinskim problemima i projektima kao što su pitanja rješavanja neperspektivnih vojnih lokacija i uključivanje lokalnih zajednica i entitetskih vlada u osmišljavanje projekata koji će opravdati preuzimanje tih lokacija i samim tim biti korisni za sve zainteresirane.

Mirko Okolić govorio je o nužnosti pripreme prijedloga zakona o parlamentarnom nadzoru na nivou BiH.

Mira Popović pozvala je članove Odbora za sigurnost NSRS-a i ZK na saradnju, razmjenu iskustava i razumijevanje kojim će se prije deblokirati programi neophodni za olakšanje svakodnevnog života bh. građana.

Ilija Vujičić je susret ZK i Odbora za sigurnost NSRS-a nazvao historijskim i potezom ljudi koji žele izlazak iz sadašnje situacije i začaranog kruga od kojeg niko u BiH nema koristi.

Izražavajući zadovoljstvo održanim sastankom i razgovorima koji su vođeni između članova ZK i Odbora za sigurnost NSRS-a, predloženi su sljedeći

ZAKLJUČCI:

1. Potrebno je organizirati češće susrete između radnih tijela Parlamentarne skupštine BiH i Narodne skupštine Republike Srpske, a s ciljem uspostavljanja bolje saradnje i razmjene informacija o aktuelnim pitanjima iz sektora odbrane i sigurnosti.
2. Podržava se održavanje Druge konferencije o aktuelnom stanju sigurnosti u Banjoj Luci, koju bi organizirala Zajednička komisija za odbranu i sigurnost BiH u saradnji s Odborom za sigurnost NSRS-a.
3. Članovi ZK za odbranu i sigurnost BiH i Odbora za sigurnost NSRS-a iniciraju održavanje sastanka i seminara svih odbora i komisija na nivou BiH, RS-a, FBiH i Brčko Distrikta BiH koji se bave pitanjima odbrane i sigurnosti, kao i policijskih agencija i tijela o temi „Presretanje telekomunikacija, zakonski osnovi i uloga policijskih agencija i zakonodavne vlasti u uređenju te oblasti“.
4. Potrebno je inicirati razgovore s nadležnim u Ministarstvu odbrane BiH, Vijeću ministara BiH i Predsjedništvu BiH o preuzimanju neperspektivnih vojnih lokacija od strane lokalnih zajednica.
5. Potrebno je raditi na osmišljavanju seminara i radionica o temama koje bi educirale članove odbora i komisija za odbranu i sigurnost a koje nameće aktuelna situacija.

Predsjedavajući
Zajedničke komisije
Branko Zrno